

جوانیں سنگت

لوگ نمبر 10 ء 11 یکجاہ ات آنت۔ گلی نامیں پیشی یے لوگ نمبر 10 ء نشتگ ات ء ٹلو نامیں گچکے لوگ نمبر 11 ء نشتگ ات۔ دوئیں لوگانی نیام ء دیوالے ات۔ گلی مُدام دیوال ء سر ء نشت۔ ٹلو ء سرکیت نہ کُرت پمیشکا زہر یے اتک۔ آئی ء وہدے گلی دیوال ء سر ء دیست گُڑا مُدام وک ات یے۔

ٹلو ء واہند ء وہدے آترگ ء بُرت گُڑا آئی ء مُدام لوگ نمبر 10 ء تہا سُرک دات۔ اگان آئی ء چم پہ گلی ء کپتاں گُڑا وک ات یے۔ ہردو مُدام مڈ ات آنت۔ بلئے ایشانی مڑگ زوت ہلاس بوت۔ گلی ء چک بوت۔ سئے، کسان ء گونڈیں چک۔ آہانی رنگ سیاہ ء اسپیت ات آنت۔ پیشی ء چک وہدے پیداک بنت گُڑا اولی ہفتگ ء آہانی چم بند بنت۔ چہ دوہمی ہفتگ ء آہانی چم پچ بنت۔ وہدے گام جنگ بندات کن آنت گُڑا لہم لہم ء رونت۔ گلی ء کستریں چک ء یک گوشے اسپیت ات ء دوہمی سیاہ ات۔ آئی ء نام استارو ات۔ یک روچے استارو چہ پاٹک ء دراتک ء پارک ء شت۔ پارک ء تلاوگے است ات۔ استارو ء دیست کہ چہ تلاوگ ء جنگلے ء آپ وارت ء پدا بال یے کُرت۔ آئی ء بینگ مگسک دیست۔ بینگ مگسک آپ ء سر ء پر پر کنگ ء ات۔ آئی ء پُگلے ہم دیست۔ پُگل ء چہ آپ ء سٹ بست ء ڈن ء اتک۔ استارو آپ ء نزیک ء شت۔ آئی ء پاد شترت ء آ آپ ء کپت۔

پیشیاں آپ دوست نہ بیت۔ اوژناگ ہم نہ زان آنت۔ استارو کسانکیں پیشی یے ات۔ آئی ء آپ ء تہا چبلکی جت ء اوژناگ کنگ ء جہد کُرت۔

ہمے ساعت ء ٹلو آپ ء کِرا اتک۔ گچک اوژناگ کُرت کن آنت۔ چوں انسان ء ڈول ء جناور ہم زہگان تکلیف ء گندگ نہ لوٹ آنت۔ ٹلو ء آپ ء دور کُرت۔ آئی ء استارو گردن ء گپت ء چہ آپ ء در کُرت۔ چہ سارتی ء استارو دُرہگ ء ات۔ ٹلو ء گوں وتی لَلک ء آ چٹ ات۔ دمانے ء پد استارو وتی پادانی سر ء اوشات۔ گلی تچان ء اتک۔ آ استارو ء شوہاز ء ات۔ آئی ء دیست کہ ٹلو تلاوگ ء کِرا نندوک انت ء استارو آئی ء کِرا اوشتوک انت۔ ٹلو آئی ء چٹگ ء انت ء استارو گوں آئی ء گوشان لیب کنگ ء انت۔ چرداں گلی ء ٹلو ء میڑ ہلاس بوت۔ آہاں انگت ہواری ء لیب ء گوازی نہ کُرت۔ بلئے ٹلو ء استارو پھک سنگت جوڑ بوت آنت۔ وہدے دُچار کپت آنت گُڑا یکجاہ لیب ایش کُرت۔

نہشتہ کار: رابعہ احمد

رجانکار: اے کے بلوچ